



NOTA DE PRENSA

AL RODIU DE LA ESPECIALIDÁ DOCENTE DE LLINGUA ASTURIANA

L'Academia de la Llingua Asturiana vien siguiendo con munchu interés y fonda preocupación les notices apaecíes apocayá nos medios de prensa escrita, radio y tv., no que cinca a la tramitación de la demanda de la especialidá docente de Llingua Asturiana pal profesoráu d'Educación Primaria y Secundaria.

La síntesis d'estes notices plantega, per un llau, que'l Ministeriu d'Educación del Gobiernu d'España diz nun tener competencies pa facer posible tal especialidá y, per otru, que, darréu d'ello, la Consejería d'Educación del Principáu va facer vidable la especialidá al traviés d'un decretu autonómicu (trámite nel que va participar una comisión inter-institucional con representantes cualificaos del Ministeriu y de la Consejería d'Educación).

Énte estos anuncies, l'Academia de la Llingua Asturiana quier dexar claro lo siguiente:

1. Resulta inaudito que'l Ministeriu d'Educación tresmita la idea de que'l tema de les especialidaes docentes nun forma parte de los sos atribuciones esclusives, darréu que ye xustamente esti Ministeriu'l que les establez, tanto pal cuerpu de Maestros d'Educación Infantil y Primaria (Real Decretu 1594/2011, de 4 de noviembre), como pal profesoráu d'Educación Secundaria (Real Decretu 1834/2008, de 8 de noviembre, desarrolláu llueu col Real Decretu 665/2015, de 17 de xunetu). Asina, a título d'exemplu, les especialidaes docentes n'Educación Infantil y Primaria son: Educación Infantil, Educación Primaria, Llingua Estranxera (Inglés), Llingua Estranxera (Francés), Llingua Estranxera (Alemán), Educación Física, Música, Pedagogía Terapéutica y Audición y Llinguaxe.
2. El Ministeriu dispón, del mesmu mou, que tamién son especialidaes docentes na Educación Primaria y Secundaria les correspondientes a les llingües propies cooficiales de les respectives comunidaes autónomes (art. 2.2 del Real Decretu de primaria y art. 2.3 del Real Decretu de secundaria).
3. Ello quier dicir que cualquier concursu oposición y de tresllaos en cualquier comunidá autónoma española ha facese, necesaria y obligatoriamente,

acordies coles especialidaes docentes fixaes pol Ministeriu d'Educación, Cultura y Deporte.

4. Nun se contempla, nin nel ordenamientu xeneral del estáu nin nel de les autonomíes, nenguna posibilidá de crear especialidaes docentes de calter “autonómicu”. Ye dicir, nun hai funcionarios docentes en primaria y secundaria con una especialidá que nun tea fixada pol Ministeriu.
5. La propuesta del Conseyu Escolar del Estáu (muérganu institucional que desarrolla un llabor consultivu, d'asesoramiento y propuestes al Gobiernu del estáu en rellación con los distintos aspeutos del sistema educativu español) no que cinca a la posibidá de reconocimientu de la especialidá docente de Llingua Asturiana ye que los reales decretos amiesten un apartáu que diga: **Naquelles Comunidaes Autónomes nes qu'haya llingües non oficiales que tengan protección ilegal y formen parte del currículu, podrá dase tamién, a petición de la Comunidá Autónoma y según necesidades educatives, la especialidá propia de la llingua respectiva.** Esta ye, xustamente, la posición que defende l'Academia de la Llingua Asturiana.

Darréu de lo anterior, esta institución académica pide a la Consejería d'Educación y Cultura del Gobiernu del Principáu d'Asturies que nun contribuya, magar seja de mou involuntariu, a semar más confusión ente la comunidá educativa d'Asturies. A la escontra d'ello, l'Academia encamienta a la Consejería que la so bona voluntá pa encalzar esta demanda hestórica empobine a una negociación seria y rigurosa coles próximes autoridades educatives del Estáu que lleve a un cambéu, nel sentiu propuestu, de los decretos d'especialidaes. Sedría llamentable dexar pasar una oportunidá que vien sofitada, ente otres instituciones y coleutivos, polos sindicatos mayoritarios de la educación pública n'Asturies, poles asociaciones de padres y madres con más implantación na nuesa comunidá, pola Xunta Xeneral del Principáu d'Asturies, pola Xunta de Personal Docente non universitariu, pol Conseyu Escolar del Principáu y, como viemos enantes, pol propiu Conseyu Escolar del Estáu.

Y una consideración cabera más: toos estos y otros problemes que torguen el normal allugamientu normativu de la llingua asturiana y la so dignificación nun desapaecerán dafechu mentantu l'idioma de los asturianos nun algama l'estatus, xurídico y constitucional, d'oficialidá.

Uviéu, a 30 díes andaos del mes de payares de 2015.